

唐詩菁華

編者 劉漱石

唐詩菁華

三

周南



浙江文藝出版社

韓翃

韓翃（生卒年不詳），字君平，南陽人。玄宗天寶年間及第。與錢起等十人號為「十才子」。

《全唐書》卷二四三——二四五編詩三卷，計一百六十四首。

送李秀才歸江南

過淮芳草歇，千里又東歸。野水吳山出，家林越鳥飛。荷香隨去棹，梅雨點行衣。無數滄江客，如君達者稀。

送王少府歸杭州

歸舟一路轉青蘋，更欲隨潮向富春。吳郡陸機稱地主，錢塘蘇小是鄉親。葛花滿把能消酒，梔子同心好贈人。早晚重過魚浦宿，遙憐佳句篋中新。

同題仙遊觀

仙臺下見五城樓，風物悽悽宿雨收。山色遙連秦樹晚，砧聲近報漢宮秋。疏松影落空壇靜，細草香閒小洞幽。何用別尋方外去，人間亦自有丹丘。

宿石邑山中

浮雲不共此山齊，山靄蒼蒼望轉迷。曉月暫飛高樹裏，秋河隔在數峰西。

少年行

千點爛熳玉勒驄，青絲結尾繡纏騶。鳴鞭曉出章臺路，葉葉春衣楊柳風。

寄柳氏

章臺柳，章臺柳，顏色青青今在否。縱使長條似舊垂，也應攀折他人手。

獨孤及

獨孤及（七二五—七七七），字至之，洛陽人。玄宗天寶年間及第。《全唐詩》卷二四六—二四七編詩二卷，計八十一首。

和李尚書畫射虎圖歌

饑虎呀呀立當路，萬夫震恐百獸怒。彤弓金鏃當者誰，鳴鞭飛控流星馳。居然畫中見真態，若務除惡不顧私。時和年豐五兵已，白額未誅壯士耻。分銖遠邇懸穀中，不中不發思全功。捨矢

如破石可裂，應絃盡敵山爲空。殺氣滿堂觀者駭，颯若崖谷生長風。精微入神在毫末，作績造物可同功。方叔秉鉞受命新，丹青起予氣益振。底綏靜難巧可擬，嗟歎不足聲成文。他時代天育萬物，亦以此道安斯民。

郎士元

郎士元（？—七八〇？）字君胄，中山人。玄宗天寶年間及第。《全唐詩》卷二十八編詩一卷，計七十三首。

盤屋縣鄭礪宅送錢大

暮蟬不可聽，落葉豈甚聞。共是悲秋客，那知此路分。荒城背流水，遠雁入寒雲。陶令門前菊，餘花可贈君。

聽鄰家吹笙

鳳吹聲如隔彩霞，不知牆外是誰家。重門深鎖無尋處，疑有碧桃千樹花。

送麴司直

曙雪蒼蒼兼曙雲，朔風煙雁不堪聞。貧交此別無他贈，唯有

青山遠送君。

送張光歸吳

看取庭蕪白露新，勸君不用久風塵。秋來多見長安客，解愛鱸魚能幾人。

皇甫冉

皇甫冉（生卒年不詳），字茂政，潤州人。玄宗天寶年間及第。《全唐詩》卷二四九—二五〇編詩二卷，計二百三十四首。

巫山峽

巫峽見巴東，迢迢出半空。雲藏神女館，雨到楚王宮。朝暮泉聲落，寒暄樹色同。清猿不可聽，偏在九秋中。

三月三日義興李明府後亭泛舟

江南煙景復如何，聞道新亭更可過，處處蓺蘭春浦綠，萋萋藉草遠山多。壺觴須就陶彭澤，時俗猶傳晉永和。更使輕橈徐轉去，微風落日水增波。

送李錄事赴饒州

北人南去雪紛紛，雁叫汀沙不可聞。積水長天隨遠客，荒城極浦足寒雲。山從建業千峰出，江至潯陽九派分。借問督郵纔弱冠，府中年少不如君。

送王司直

西塞雲山遠，東風道路長。人心勝潮水，相送過潯陽。

秋日東郊作

閒看秋水心無事，卧對寒松手自栽。盧嶽高僧留偈別，茅山道士寄書來。燕知社日辭巢去，菊爲重陽冒雨開。淺薄將何稱獻納，臨歧終日自遲迴。

送陸澧郭鄴

纔見吳洲百草春，已聞燕雁一聲新。秋風何處催年急，偏逐山行水宿人。

酬張繼 并序

懿孫，余之舊好。祇役武昌，枉六言詩見懷，今以七言裁答，蓋拙於事者繁而費也。

悵望南徐登北固，迢遙西塞恨東關。落日臨川問音信，寒潮唯帶夕陽還。

送鄭二之茅山

水流絕澗終日，草長深山暮春。犬吠雞鳴幾處，條桑種杏何人。

春思

鶯啼燕語報新年，馬邑龍堆路幾千。家住秦城鄰漢苑，心隨明月到胡天。機中錦字論長恨，樓上花枝笑獨眠。爲問元戎寶車騎，何時反旆勒燕然。

劉方平

劉方平（生卒年不詳），河南人。隱居河南大谷，不涉仕途。《全唐詩》卷二五一編詩一卷，計二十六首。

梅花落

新歲芳梅樹，繁花四面同。春風吹漸落，一夜幾枝空。少婦
今如此，長城恨不窮。莫將遼海雪，來比後庭中。

長信宮

夢裏君王近，宮中河漢高。秋風能再熱，團扇不辭勞。

春雪

飛雪帶春風，裴回亂繞空。君看似花處，偏在洛陽東。

夜月

更深月色半人家，北斗闌干南斗斜。今夜偏知春氣暖，蟲聲新透綠窗紗。

王之渙

王之渙（六八八—七四二），字季凌，原籍晉陽，遷于絳都。曾任冀州衡水主簿，因被誣告而辭官，后又被啟用。《全唐詩》卷二五三存詩六首。

涼州詞二首（錄一首）

其一

黃河遠上白雲間，一片孤城萬仞山。羌笛何須怨楊柳，春風不度玉門關。

宴詞

長堤春水綠悠悠，畎入漳河一道流。莫聽聲聲催去櫂，桃溪淺處不勝舟。

薛據

薛據（七〇一？—七六七？），河中人。玄宗開元年間及第。《全唐詩》卷二五三存詩十二首。

古興

日中望雙闕，軒蓋揚飛塵。鳴珮初罷朝，自言皆近臣。光華滿道路，意氣安可親。歸來宴高堂，廣筵羅八珍。僕妾盡綺紈，歌舞夜達晨。四時固相代，誰能久要津。已看覆前車，未見易後輪。丈夫須兼濟，豈能樂一身。君今皆得志，肯顧憔悴人。

泊震澤口

日落草木陰，舟徒泊江汜。蒼茫萬象開，合沓聞風水。洄沿值漁翁，竊窅逢樵子。雲開天宇靜，月明照萬里。早雁湖上飛，晨鐘海邊起。獨坐嗟遠遊，登岸望孤洲。零落星欲盡，臃腫氣漸收。行藏空自秉，智識仍未周。伍胥既仗劍，范蠡亦乘流。歌竟鼓楫去，三江多客愁。

早發上東門

十五能文西入秦，三十無家作路人。時命不將明主合，布衣空惹洛陽塵。

褚朝陽

褚朝陽（生卒年里不詳），玄宗天寶年間及第。《全唐詩》卷二五四錄詩三首。

登聖善寺閣

飛閣青霞裏，先秋獨早涼。天花映窗近，月桂拂簷香。華嶽三峰小，黃河一帶長。空間指歸路，煙際有垂楊。

劉沓虛

劉沓虛（生卒年不詳），常州人。玄宗開元年間進士。《全唐詩》卷二五六編詩一卷，計十五首。

登廬山峰頂寺

孤峰臨萬象，秋氣何高清。天際南郡出，林端西江明。山門二緇叟，振錫聞幽聲。心照有無界，業懸前後生。雖知真機靜，尚與愛網并。方首金門路，未遑參道情。

闕題

道由白雲盡，春與青溪長。時有落花至，遠隨流水香。閒門向山路，深柳讀書堂。幽映每白日，清輝照衣裳。

柳中庸

柳中庸（生卒年不詳），名淡，河東人。官為洪府戶曹。《全唐詩》卷二五七存詩十三首。

征怨

歲歲金河復玉關，朝朝馬策與刀環。三春白雪歸青冢，萬里黃河遶黑山。

涼州曲二首（錄一首）

關山萬里遠征人，一望關山淚滿巾。青海戍頭空有月，黃沙磧裏本無春。

蔣冽

蔣冽（生卒年不詳），義興人。官至尚書左丞。《全唐詩》卷二五八存詩七首。

南溪別業

結宇依青嶂，開軒對綠疇。樹交花兩色，溪合水同流。竹徑

春來掃，蘭尊夜不收。逍遙自得意，鼓腹醉中遊。

古意

冉冉紅羅帳，開君玉樓上。畫作同心鳥，銜花兩相向。春風正可憐，吹映綠窗前。妾意空相感，君心何處邊。

沈千運

沈千運（生卒年不詳），湖州人。曾屢試不中。元結編《篋中集》將其詩輯在首篇。《全唐詩》卷二五九存詩五首。

山中作

棲隱非別事，所願離風塵。不辭城邑遊，禮樂拘束人。邇來歸山林，庶事皆吾身。何者爲形骸，誰是智與仁。寂寞了閒事，而後知天真。咳唾矜崇華，迂俯相屈伸。如何巢與由，天子不知臣。

古歌

北邙不種田，但種松與柏。松柏未生處，留待市朝客。

王季友

王季友（生卒年不詳），河南人。代宗時曾為官。《全唐詩》卷二五九存詩十一首。

雜詩

採山仍採隱，在山不在深。持斧事遠遊，固非匠者心。翳翳青桐枝，樵爨日所侵。斧聲出巖壑，四聽無知音。豈爲鼎下薪，當復堂上琴。鳳鳥久不棲，且與枳棘林。

于逖

于逖（生卒年不詳），河南汴州人。窮老山野，終身未仕。《全唐詩》卷二五九錄詩二首。

野外行

老病無樂事，歲秋悲更長。窮郊日蕭索，生意已蒼黃。小弟髮亦白，兩男俱不強。有才且未達，況我非賢良。幸以朽鈍姿，野外老風霜。寒鴉噪晚景，喬木思故鄉。魏人宅蓬池，結網仁鱣魴。水清魚不來，歲暮空徬徨。

張彪

張彪（生卒年不詳），洛間人。玄宗天寶末隱居嵩山，被杜甫稱為「張山人」。《全唐詩》卷二五九存詩四首。

雜詩

富貴多勝事，貧賤無良圖。上德兼濟心，中才不如愚。商者多巧智，農者爭膏腴。儒生未遇時，衣食不自如。久與故交別，他榮我窮居。到門懶入門，何況千里餘。君子有徧性，矧乃尋常徒。行行任天地，無爲強親疏。

趙徵明

趙徵明（生卒年不詳），天水人。《全唐詩》卷二五九存詩三首。

思歸

爲別未幾日，去日如三秋。猶疑望可見，日日上高樓。惟見分手處，白蘋滿芳洲。寸心寧死別，不忍生離憂。

元季川

元季川（生卒年不詳），河南人。《全唐詩》卷二五九存詩四首。

登雲中

灌田東山下，取樂在爾休。清興相引行，日日三四周。白鷗與我心，不厭此中遊。窮覽頗有適，不極趣無幽。慘然歌採薇，

曲盡心悠悠。

秦系

秦系（七二〇—八〇〇？），字公緒，會稽人。曾避剡溪，自稱東海釣客。后又結廬泉州南安九日山，并注《老子》。《全唐詩》卷二六〇編詩一卷，計四十首。

寄浙東皇甫中丞

閒閒麋鹿或相隨，一兩年來鬢欲衰。
琴硯共依春酒甕，雲霞覆著破柴籬。
注書不向時流說，種藥空令道者知。
久帶紗巾仍藉草，山中那得見朝儀。

題茅山李尊師山居

天師百歲少如童，不到山中竟不逢。
洗藥每臨新瀑水，步虛時上最高峰。
籬間五月留殘雪，座右千年廢老松。
此去人寰今遠近，回看雲壑一重重。

閒居覽史

長策胸中不復論，荷衣藍縷閉柴門。
當時漢祖無三傑，爭得咸陽與子孫。

任華

任華（生卒年不詳），青州人。肅宗時曾任秘書省校書郎。《全唐詩》卷二六一存詩三首。

寄李白

古來文章有能奔逸氣，聳高格，清人心神，驚人魂魄。我聞當今有李白，大獵賦，鴻猷文，嗤長卿，笑子雲。班張所作瑣細不入耳，未知卿雲得在嗤笑限。登廬山，觀瀑布，海風吹不斷，江月照還空，余愛此兩句。登天臺，望渤海，雲垂大鵬飛，山壓巨鰲背。斯言亦好在。至於他作多不拘常律，振擺超騰，既俊且逸，或醉中操紙，或興來走筆。手下忽然片雲飛，眼前劃見孤峰出。而我有時白日忽欲睡，睡覺欬然起攘臂。任生知有君，君也知有任生未。中間聞道在長安，及余戾止，君已江東訪元丹，邂逅不得見君面。每常把酒，向東望良久。見說往年在翰林，胸中矛戟何森森。新詩傳在官人口，佳句不離明主心。身騎天馬多意氣，目送飛鴻對豪貴。承恩召入凡幾迴，待詔歸來仍半醉。權臣妒盛名，羣犬多吠聲。有勅放君却歸隱淪處，高歌大笑出關去。